



“Sacrabolt, e je ribaltade une coriere!” al disè il Checo sentât a lei il Gazetin te Ostarie di Lino. “Drece chel gjornâl, cjastron” i rispuindè l’ostîr.

A Checo no i leve jù di fâsi cjoli pal cûl cuant ch’al faseve fente di lei il gjornâl, ben cussient di no jessi inscuelât e di no savê pont di letare.

La scuele la veve sul stomi fin di frut e di cuant che in seconde elementâr, ch’a la faseve pe tierce volte, la mestre Curine a lu veve metût daûr de lavagne cun lis orelis di mus, a nol veve plui metût pît te classe. Par dî il vêr a no jere dome chê la magagne di Checo, parcè che lui al veve un altri bruseghin ch’a no i leve ni sù ni jù. Tes provis pe corâl de glesie, il mestri diretôr a lu veve scartât disintji:

“A no tu âs une buine orele pe musiche, ma orelis buinis par fâ muset, chel sî”

Ven a stâi: mus a scuele e orelis di purcit te corâl, i restavin pocjis sperancis par podê fâ alc di bon di grant.

Doi mestris ch’a i vevin segnade la vite, massime pes umiliaziions viers i compagns di etàt ch’a no pierdevin ocasion par coionâlu, tacant a cuarnâi e vuicâi tant ch’al fos un mus o ben un purcit.

Bon, il nestri a nol jere om di rindisi a fâ il bagul dal paîs par dute la vite, si che duncje al decidè di lâ a cirî fortune ator pal mont, e a la fin le veve fate pardabon, lavorant tant che un mus in Svizze. Fate fortune, metût sù famee, i jere vignude un voie purcite di tornâ al paîs par fâ viodi a ducj che ancje i mus a puedin vê alc di dî. Si che duncje, comprade une vilute, al leve sù e jù cu la sô Audi de Svizze a l’Italie, e par fâ viodi a ducj il so benstâ al leve di buinore a bevi il caffè e a “lei il Gazetin” là di Lino. Pecjât par chê maladete coriere ribaltade

ch'a lu faseve tornâ indaûr tal timp, rionzint la fote des lengacis:

“Cjastron al è partît e cjastron al è tornât” i disevin.

Ma une dî, tant che Checo al leieve, al jentrà te ostarie un bocon di zovin ch'al dîs:

“Pai, mi paiaristu un tai ch'o ai di domandâti un consei”, al disè, “E tu cui saristu” i clame Lino.

“Soi Jean Paul, fi di Checo, pene rivât di Gjinevre” i rispuindè.

“Pai” al le indenant il zovin, “o ai finît l'Erasmus al CERN e jessint ch'o soi laureât in fisiche des particulis, la Fabiola Gianotti a mi à domandât di restâ là vie a fâ il ricercjadôr, ce aio di fâ?

Dî dome che Lino e ducj i siei aventôrs a restarin cun tant di pipe, e je nome une part di veretât.

di Bepi Zefon